

林初文詩文全集

林初文詩文全集

明福清林章

男君遷編次
古度

七言絕句

宮詞

禁柳宮花總自春三千粉黛幾回新君王未
下鴛鴦牒莫問昭陽第一人

其二

一入長門十二秋自憐顏色未曾愁朝朝流水官前過不肯題詩葉上頭

渡江詞

不待東風不待潮渡江十里九停橈不知今夜秦淮水送到揚州第幾橋

楊柳詞

楊柳青青灞水濱春來日日送行人東風不與長爲主送盡行人却送春

塞上曲

遼城一片黃雲裏
胡騎千群黑海頭
弓影長懸秦月曉
笳聲不斷漢時秋

過鞏華城

鞏華城外草連天
威漠橋頭水滿川
草色自當春意好
水聲偏得路人憐

春日簡友

春城柳色入東華
莫惜驂騑過酒家
記得去

年江上別風吹二十四橋花

歷陽樓懷尤子輝同年

山繞孤城水遶村斜陽寂寂下平原當時對
酒人何在唯有江離綠蒲門

夜度恨這關

楚水東邊別路多秋風夜半動離歌迢迢恨
這關前月獨照行人過汴河

過銅雀臺故地

漢人不怨魏人愁百戰山河一日休銅雀舊
臺何處是悠悠漳水自東流

真州逢薛子謙言別

江上相逢欲暮春落花飛絮滿行津孤舟明
日丹陽道愁殺江南江北人

聞鴈

萬里關河一日回曉風夜月遞相催南飛若
過青霞嶺好爲傳書下鏡臺

西湖雨後示友

夜來風雨過湖頭落盡桃花水不流
唯有西陵橋畔樹爲君留得一枝愁

江上望廬山

停橈江上望巉峨
山北山中好更多
不識月宮何處是
兩峯橫黛蹙雙蛾

重登北固山

南遊楚越北燕關
二十年前上此山
今日重

來山上望白雲流水不曾還

登顧龍山

金沙十里水悠悠水上青山一點浮祇自翠
華經幸後至今草木不曾秋

送妓之金陵

畫漿夷猶錦纜迴美人東上鳳凰臺朝朝梳
洗臨秋水一路芙蓉不敢開

河水十章

有引

南氏猗蘭以良家女流落風塵多情
態且善琴操見余於河西務爲鼓一
再行淒淒然有悲怨之聲余感之賦
河水十章南清源人時壬午之秋也
河水灣灣遠大堤堤邊楊柳一時齊可憐折
盡青青色長送行人出水西

其二

河水平平帖暮雲河天黯黯散涼曛河頭來

往船無數盡是商人不是君

其三

河水潺潺一枕聲秋風瑟瑟五更情相思相
怨不成寐一曲倚蘭曉月生

其四

河水漫漫日夕流流將清恨到青州不知郎
在青州不妾在河西西盡頭

其五

河水深深深幾何
情深深未信水深多
臨流試灑相思淚
一滴明珠一滴波

其六

河水蕭蕭露氣涼
青樓歌舞夜初長
尊前莫奏求凰曲
除却相如不是郎

其七

河水盈盈一帶天
思君欲渡苦無船
何當化作中流月
渡水隨君處處圓

其八

河水清清妒殺人時時一照一傷神紅顏不
及河間石落在清流不染塵

其九

河水迢迢去不回花開花謝自相催西風一
度人如削耐得西風幾度來

其十

河水悠悠流幾時至今流不盡相思南威曾

擅君侯寵知得當時貌似誰

過林丙卿別室悼其亡姬劉文姬爲歌

十章

憶此當年貯阿嬌花圍月繞可憐宵如今只
有西飛燕獨拂梁塵話寂寥

其二

粧樓繡閣自依然人面桃花隔兩季留得香
魂愁裊裊博山鑪上一條烟

其三

零落花鈿委翠茵
箇中何處不憐人
更堪開得金箱看
撇下年來髻樣新

其四

三月鶯啼春欲殘
玉京西望路漫漫
回頭却憶投詩處
門掩梨花風雨寒

其五

一自乘鸞去不回
更無人倚舊時臺
春深十

二闌干曲半是紅塵半綠苔

其六

十五年來夢不分爲君行雨復行雲一朝別
去陽臺下雲雨飛時不見君

其七

一曲傷春春亦傷鳥啼花落送紅粧當時不
解東風意空對青山怨夕陽

其八

春草萋萋脚下生
郎曾行處妾都行
年來因過麻姑洞
識盡吳山楚水情

其九

一束瑤琴一束經
挑將歸去訪明星
行時認得來時路
片片蓮花海上青

其十

嫁得浮雲壻
奈何道遙一曲不堪歌
從今分付東流水
莫與相思淚較多

晁鸞鸞生日

漢苑春風此夕偏
百花生後燕飛前
那知一點瑤光影
落在青樓十八年

書燕燕圖

春色年年海水涯
烏衣城裏是奴家
飛雲別無消息愁
逐東風問柳花

燕燕

鳳子文章燕子標
君家姊妹奪來嬌
殺人寂寞

是風流陣莫向宮中鬪楚腰

別曲

一曲離歌淚兩行綺疏斜月冷如霜自拋錦
瑟歸羅帳待得郎行却罵郎

白觀

花曉簾寒攬鏡慵東風吹恨上眉峰無緣化
作雲和雨飛入巫山十二重

題王素春號

月寂嬋娟應是素梅偏冷淡故先春年來脂粉街頭貴奈此蛾眉不掃人

陳大難於見客書此促之

掃得春山翠欲流瑤琴一弄午風柔新教鸚鵡能憐客花底聲聲喚下樓

賈七

纖纖彈指十條玉嫋嫋歌喉一串珠若使午兒爲姊妹韓郎應是小姨夫

陳二

新栽楊柳枝條別舊伴鴛鴦羽翼同春日樓
臺花正好尊前不敢唱回風

崔季鶯

怕教雪落歌應懶愁作雲飛舞不輕偷向東
風啼柳畔一行花雨一聲鶯

爲宋洛雲寄林大合

春江拾翠日徘徊畱枕曾憐子建才不信多

情歸賦後更無一夢此中來

封文西旣嫁而出賦此嘲之

花時重見不勝情
寂是西家可比卿
也向館娃宮裏出
扁舟誰共五湖行

湘雲

三尺羅襦六幅裙
春風蘭麝散氤氲
花前來去嬌無着
只是湘江一片雲

嘲雲卿不咲

鸞嬌鳳小可憐孤爲雨爲雲定有無莫道長
顰不傾國西施眉裏破姑蘇

爲卿雲送別

萋萋春草一時芳渺渺關河萬里長妾本陽
臺雲化得可能飛夢過瀟湘

爲文西寄情

教成歌舞也風流曾學西家得似不今日眉
顰非是病爲郎鎖下一春愁

晁燕燕新招林大嘉

婉變紅粧妬小喬月明銅雀壻新招長安陌
上千條柳不及今宵一搦腰

李四孃生日

百花咲傍綺筵開此日花神謫世來鄭重四
孃能得婿尊前誰是少陵才

吳彩鸞席上有懷

牡丹亭畔綺筵開恍惚簫聲月下來十二闌

千雲一片玉樓舊是鳳凰臺

爲李大孃寄情

當時羅帶綰梅花今日鸞簫隔彩霞寂寞芝
房春月夜東風彈淚落琵琶

有懷

除到丹山方有鳳曾攀月桂更無花分明不
是高唐夢今日如何夢也差

聞鴈寄情

一聲孤雁過江城
叫落寒雲月五更
不識美人歌舞罷
燈前聽得爲誰情

秋牡丹寄情

八月籬邊見牡丹
雨中孤賞不成懽
惟應挿傍如花面
半醉教郎倚臂看

爲郝秀送林大合之武陵

送君南出越江濱
江水茫茫正及春
莫向浣紗溪上去
溪邊恐有浣紗人

別意

十二花街片月明樓臺處處管絃聲爲言莫
奏秋風曲中有離人夢不成

送歌者遊西湖

學成歌舞擅豪華二十年來乍別家珍重春
風湖上去莫教妒殺六橋花

別曲

水浣吳綾碧似苔金刀玉尺妾親裁剡中風

雪愁人甚郎欲看山着去來

嘲友人

塞上名花亦好開仙郎春晚探花來檀州不
是桃源路何事相逢只一回

豔曲

百花臺上百花開妬柳驕桃一處栽惟有東
風情最好桃邊吹過柳邊來

壽伎

曾教歌舞壓青樓此日桃花咲白頭十二金
釵齊獻酒何人不羨舊風流

其二

瑤池會上謫來人管領風花七十春昨日青
鸞傳信至華筵捧得一桃新

留別

取次看花二十年憐花顛倒得花憐從來不
慣花前別今夜花前一闌然

雪夜留別

離歌一曲雪紛紛
寒入南天萬里雲
明夜孤舟重回首
芎羅山上月如君

送行

春花二月滿城紅
寶馬雕輪獨向東
日暮鶯啼聽不得
教人空怨綠楊風

別情

與君俱是玉京雲
飛下青樓逐鳳羣
無奈曉

風吹散去巫山湘水各沾裙

其二

風雨瀟瀟古渡頭看君獨上木蘭舟
江城日夕寒烟下欲倚吳山第幾樓

其三

浣紗溪斷潮江灣十二長亭一望間
見說孤舟過剡水相思便隔兩重山

其四

郎行日日渡風潮
妾夢時時繞石橋
此夜月明多少恨
不堪吹入鳳凰簫

其五

不曾相識偶相逢
車向西行馬向東
莫道相思是無路
梁塘水與浦橋通

其六

紅粉樓中花欲睡
青油幕下酒初醒
年來打破風流陣
却道陰符是外經

其七

無情花對有情人終日看憐總不真風雨枝頭相別去可曾回首故園春

其八

東風春色滿瑤臺萬紫千紅次第開莫怪桂
花開不到姮娥移向廣寒栽

贈別

妾在錢塘第一灣郎行出過苧羅山山前溪

月明如鏡不爲愁人照別顏

幼妓

眉如柳葉臉如花無限風流未破底妬殺當年石城女莫教輕易入盧家

艷情

綠草長堤軟似氈紅簾小簷快於船匆匆不及通名姓悔却相逢大道邊

戲題

栽花栽樹莫栽楊最是楊花沒主張一陣東
風禁不得教人愁殺滿枝狂

簡友

秦樓夜月綺羅光燕市春風麴米香嬌殺梅
花無落處美人何惜醉君傷

王大索題牡丹

綠意紅情取次粧不勝憨態斷人腸相逢何
用頻相問洛下花神舊姓王

陳二席上戲贈

芙蓉臉映雙眸水楊柳眉拖兩鬢霞一曲春
風簾外度鶯啼玉樹滿庭花

贈蘭卿

眉分楊柳無勞畫手抱枇杷不忍彈喚作百
花都未是十重山上九秋蘭

見卓姬

素羅裙帶瘦腰肢恰似文君新寡時一曲綺

琴應未奏先知是箇鳳凰詞

其二

柳陌花街十二條條風雨閉春宵
尊前忽聽霓裳曲腸斷當年倚玉簫

其三

豈是青樓薄倖人不堪懷舊轉憐新
東風無數啼花鳥只有鶯聲似去春

其四

眉羞蛾綠髮羞蟬花裏神姬月裏仙
最是多情禁不得逢人一曲想夫憐

其五

千金揮入美人家歌斷東風醉月斜
曾愛芙蓉移未得於今輕易莫看花

其六

春風環珮彩雲迴咲出迷香洞裏來
月滿紫簫傳艷曲花間高結鳳凰臺

其七

多情燕子不禁孤
嫁得東風意有無
顰綠啼紅春意惱
隔花愁殺大姨夫

書李胤芝芝蘭圖

九畹春花五色雲
紫衣香佩總氛氲
只今移在深深處
時有清芬十里聞

訪妓

春粧日日倚瑤臺
百喚千呼不下來
却把瑤

琴誇一弄天風吹落紫雲回

無題

曾從洞口送胡麻一隔山門卽海涯自是仙
郎忘舊路桃花流水不曾差

爲妓贈別

水浣胡羅玉一條爲郎裁帶緊纏腰重來不
信相思苦但看圍痕幾寸銷

妓塞月

十年春夢繞青樓一夕鄉心紫塞秋爲愛邊
頭看邊月不堪邊月使人愁

怨妓

手撚花枝花下行水羅風動藕絲輕碧雲初
合青樓暮獨倚闌干嘆一聲

武林別諸妓

不須相對泣羅巾此去長安爲看春十里杏
花紅似綺一枝先寄六橋人

漢上謝岳蘭卿

漢上有陽臺卽神女會襄王處

美人樓閣傷陽臺雨意雲情鬱不開可咲宋
郎能作賦無緣一到夢中來

月仙席上逢何陳二生

尊酒相逢別地秋清歌一曲白雲愁江波多
是湘妃淚不奈離人眼底流

武昌訪管妓夜宿西來庵

年來無夢到青樓隨處僧房可一投夜半鐘

聲驚坐起却疑明月是楊州

文卿席上夜歸

醉下歌樓月已低
斷魂人在小橋西
繞城一帶相思路
只有霜華照馬啼

歌者劉戊席上

漢陽明月下秋江
客思翩翩不可降
所恨押衙今已歿
更從何處覓無雙

漢口朱蘭席上分韻得花字

鄂渚城邊問酒家
秋風楊柳已無花
那知十載青樓恨
一夕翻生漢水涯

田功甫同袍携漢陽李岳二姬索賦

漢濱遊女舊風流
江水盈盈未可求
不是多情似交甫
雙珠那得一時投

漢上見歌者陳無號

十二年前過武昌
新栽楊柳未成行
如今相見秋江上
流水飛花總斷腸

鄭城望夜寄歌者

秋城東畔見嬋娟
回首青樓一惘然
今夜相思無着處
不知清影爲誰圓

皖江訪妓者吳相如

青天何處覓朝霞
冷落春風幾度花
匹馬訪君江上路
傷心不爲聽琵琶

留別歌者

客路迢迢入楚鄉
離山別水斷人腸
相逢俱

是相思鳥君向南飛我北翔

潛溪歌者墜馬戲書

試作梁家墜馬妝
桃花倒挂玉玳瑁
莫教流水飄蘭麝
惱殺春風遊冶郎

友人携妓之金陵應試

美人相約玉京遊
花發天風桂樹秋
昨日羽衣報消息
蟾宮結箇鳳凰樓

一夜遇林大東訪朱八

幾年夢不到楊州
今夕爲君一倚樓
莫向尊前歌子夜
闌干西畔月華秋

訪美人張鳳

一上青樓一斷腸
朝雲暮雨已茫茫
花間啼鳥多相似
不是琴中舊鳳凰

爲歌者招婿

拂拭菱花取次粧
雙蛾不掃待新郎
莫言千里姻緣少
月下紅繩裊裊長

戲嘲老年大脚妓

春花秋月不知年
花裡孤神月裡仙
載盡風流多少客
無人知是脚如船

代妓送別

雪滿江頭風滿波
孤舟欲渡柰郎何
問人記得山陰路
明月生時夢裡過

湖州舟次

湖天一帶雨陰陰
湖水平流百尺深
兩岸青

山行不盡扁舟落日愁人心

江上月夜

一夜歸心落海東
扁舟萬里度西風
爲憐明月不成寐
把酒江頭坐夜窮

題羊

八歲時師命題所
見羣羊首者立就

三百羣中步獨先
時時高叫白雲天
曾從北海風霜裏
伴過蘇卿十九年

官怨

空負蛾眉入漢家
淒涼永巷度年華
君恩多似春宵雨
不爲銀屏洗淚花

其二

妾貌如花不耐秋
君恩似水可回流
宮中未到愁難到
到得官中總是愁

閨情

朝朝樓上望陽關
過盡飛鴻人未還
十二巫峯雲雨冷
一時都作望夫山

卓文君

王孫有女字文君本是蛾眉綺色雲一落鳳
凰琴裏去錦江春暮雨紛紛

西施

苧羅山下是儂家春水溪頭自浣紗不合姑
蘇臺上去月明空照越城花

寄遠

去年人逐鴈南歸今鴈先人已北飛百尺樓

頭看不到春江森森夕陽微

襍憶

平蕪如水月如霜下馬桑乾客舍涼憶得蛾
眉新浴罷瑤琴一曲倚銀床

夢題巫山

莫道神仙事渺茫昨宵神女下高唐分明指
點三生話記取殷勤到武昌

重過廬山

而今知得色爲空二十年來一夢中
昨向月宮菴裏宿有人猶喚作花翁

潛溪泛舟

千迴百折繞芳堤水淨沙明樹影齊
總爲桃花春去後無人知是武陵谿

邊行曲

飲馬河邊夜渡關飛狐嶺畔曉看山
千行別淚砧中蘂一寸鄉心刀上環

爲妓送別

逢君原在楚江濱
今去淒淒江草春
莫向沅湘湘水上
相逢忘却楚江人

溪泊

清溪一曲繞城頭
夜半寒聲咽不流
綠樹烟中明月裏
幾時送盡客邊愁

香河店

片鴉啼起曉魂孤
山自燕關水自吳
十五年

來花下客冷風斜月一屠蘇

元夕步橋

年年人別在春前歲歲花開向客邊
今夜玉河橋上月看來只是不曾圓

夏日偶成

草徑柴門日日開不妨車馬却誰來
晝長人困渾無事但把花枝嗅幾回

客中秋日

客舍風霜十度寒故園花木想闌珊不知窻
下親栽竹綠玉新添得幾竿

僧房除夕

爆竹三聲客枕邊曇花一點佛燈前只消今
夜和明日萬里離家是兩年

病起

綠楊風颺酒旂高紫陌塵飛馬足勞春去幾
時人乍起賣花市上賣櫻桃

題花帳

薄羅織縠似鮫綃染得春花種種嬌
管取清風明月夜夢魂多在洛陽橋

贈印山鍊師

三十年來臥白雲無人知是紫陽君
月明橫笛東山上吹下長空鶴一羣

贈講僧

西來一樹鉢曇花落
在山中幾歲華昨日大

雲經譯了青天飛下紫袈裟

贈楊將軍

夕陽笳鼓開於雲江上樓船習戰回盡道將軍新約束三千壯士不啻枚

鳳仙花

春光如酒送年華一醉青樓十載賒今日歸來醒處看繞闌惟有鳳仙花

其二

爲向東君得品奇
風光不遜百花時
鸞標鳳格無人識
只合仙郎折一枝

菊花

桃花紅殺藕花香
偏是黃花瘦得強
不爲西風愁不落
欲留憔悴待儂郎

芍藥花

千紅萬紫一時來
箇獨含情未肯開
豈爲東風欲相妬
逡巡畱待相公回

有贈

十日工夫繡一禪
鴛鴦蹴縵水羅痕不教郎
把花間晒花氣能令玉骨渾

贈香河王明府

江南塞北正風霜
草木蕭條總可傷
惟有河陽春去後
水流猶帶落花香

贈鄭尉

泛得芙蓉淥水來
一時幕下共憐才
江城風

雨花多事好爲潘郎次第栽

贈陳椽

九章法律太縱橫經術由來自此生漢室公卿應不少至今人說鄼侯名

贈李晦卿

君家道德舊經函今日相逢得一叅十數年前過尹喜曾言紫氣在江南

贈醫士

不合多情似宋郎長將愁病度年光問君那
有青鸞血可與離人續斷腸

贈棋士

知君本是橘中仙流浪江湖不記年莫與人
間爭勝負人間機械更堪憐

贈汪都護

將軍作鎮石頭關玉帳高臨海上山一望滄
溟幾萬里雲平波靜鼓聲聞

贈漢卿

君家寶劍號湛盧入楚何年却入吳如今把
向王孫手不是千金價莫沽

贈王鑑士

曾向平陽識貴奴一朝聲價滿江湖不知十
載風波客亦有封侯骨也無

別喬太學

瀟瀟風雨及秋分江上孤帆出白雲此去吳

門惟有月尊前相對得如君

別張仲豫

杯酒今宵聊共把扁舟明日不同登無情最是長淮水斷送離人入廣陵

別陳生

自從下榻喜逢君夜雨燈前幾論文今日相思三百里江城一片隔秋雲

揚州席上遇友

十年不見故鄉人今日逢君意自親
莫惜花前一行酒幾回共醉廣陵春

揚州遇聶明吾道者

有客相逢淮海間芙蓉爲佩玉爲冠
自言曾過清泠水覓得玄珠借一看

寄吳門諸友

十年裘馬滿紅塵落得江湖幾故人
明日長安花又發寄君應有一枝春

送人入閩

片片青峯出白雲
閩山越水此中分
君行正在秋風裏
一路猿聲不可聞

送人南還

錢塘江上柳條生
君向南歸我北行
欲折一枝聊贈別
可憐樹底未啼鶯

送人入塞

綠楊如霧草如烟
十里長亭一別筵
此日送

君關上去春風正在馬蹄前

送人從軍

胡笳吹動漢關秋馬首西風拂蒺藜君看沙
場千萬里幾人容易覓封侯

送楊將軍渡遼

十萬遼兵入戰圖將軍東渡擬平胡不知暮
下風流客亦有陳琳草檄無

送人還家

結束千金故里行
春風澹蕩馬蹄輕
年年歸思先芳草
不是王孫舊日情

送人遊東粵

爲愛看山汗漫遊
不辭風雪度羅浮
知君定有相思處
夢破梅花月滿樓

送王伯醇之越

吳山越水白雲昏
君去登臨可斷魂
只恐春來芳草綠
萋萋何處憶王孫

送李生還閩

十五年來見面稀
相逢幾日又先歸
送君惟有關山淚
遙逐楊花馬首飛

送純卿兄還閩

載將烟雨滿行舟
歸去家山菊已秋
恨殺錢塘江上水
送君不到建溪頭

將歸送友

君到家時我亦還
西風木葉想爛斑
青山三

十六灣裏尊酒相迎第幾灣

客中送別

長缺歸來不用歌如今世路盡風波相逢幾
日還相送山水無多別恨多

送李君之蜀

芙蓉城市錦江頭匹馬西風起壯遊君去峨
眉山上望月明何似秣陵秋

送李子石同年落第南還

折柳都門三月時送君歸去暮春思東風解
得行人意只向青萍帶上吹

卽席送友

不待登臨悵別離尊前相對卽相思青青柳
色春江畔愁殺行人未折時

送林廣文

幾年湖海悵離羣此日逢君又送君見說堂
前三鱸下不勞歸去賦凌雲

送內姪還閩

五月江頭啼鴈鴒送君歸去客中孤故園親
友如相問爲道終生已棄繻

送鄒體乾之楚

何日橋頭駟馬車看君此去轉憐予莫辭尺
素頻相寄楚水東邊足鯉魚

送漢卿之武林

千山萬山啼杜鵑江南三月春可憐君行爲

問舊遊處只在西陵流水邊

送金清之北還

楚水潮頭上石城秋風嫋嫋片帆輕勸君莫
唱關山月千古愁人此一聲

送陳二之鄖城訪友

十年道路各艱難今日相逢不忍看正是秋
風搖落處綈袍誰念故人寒

送張生

年少張郎美玉姿五湖琴劍乍歸時囊中剩
得題詩筆却向春闈學畫眉

送野雲上人之金陵

皖公山下玉池開馬祖菴前寶樹廻一箇野
狐留不住偷珠走上雨花臺

牡丹

有引

牡丹無慮千種傳者甚稱姚魏不知
林家紅之擅名在二氏前久也此余

家品故爲表之

至今三月洛陽花魏紫姚黃處處誇不道當時紅第一春風先已屬林家

白鳳仙花

滿庭紅紫已闌斑只少當時一玉顏自是不堪風雨妬飛將歸去鳳凰山

梅花

爲占年華耐歲寒神仙風骨瘦闌珊一枝春

色無人惜且向尊前取次看

安石榴

一種遙從海上移
憑君惹得最高枝
從今惹得相思苦
歲歲花開五月時

咱夫蘭香

是咱親製爲咱夫
輕薄誰教入漢都
寄語阿蠻休浪贈
五陵年少氣橫胡

杏花圖

一枝擎出漢宮春
朶朶紅雲下
紫宸照暎曲
江流水色風光妬
殺玉樓人

私情

野梅聊解客中愁
敢與名園花並幽
若借一枝栖彩鳳
歟爲情鬼也風流

荅情

未信裴郎共此情
夜來何幸見雲英
玄霜搗盡無人會
春向房櫳煖處生

寫愁

懽會無多別恨生誰將天意定陰晴
嫦娥今夕愁如海淚落陽臺作雨聲

桃花燕子圖

玉釵零落背東風無復君恩賜掌中
知得桃花魂可化嚙將歸去未央宮

水月圖

水月山光一片秋看來渾是洛川頭
不知神

文今何處拋得明珠夜夜流

櫻桃

百果前頭獨占新
鶯銜不盡內園春
箇中風味誰能識
只有當年姓鄭人

並頭蓮

秋風秋雨莫相侵
憐取生來是一心
若使文君曾似得
當時豈作白頭吟

咏枯柳

用唐楊巨源韻

飛盡空綿落盡絲愁霜愁雨只殘枝行人還
憶青青意留與東風次第吹

登梅花嶺

曾向羅浮一夢回春風彷彿此登臺梅花正
好休歸去定有歌聲月下來

登觀音山

何年幻出普陀光窈窕天門水月涼苦海茫
茫渡多少却來山裏泛慈航

過小孤山

俗呼小姑山

寄語彭郎問小姑
朝朝江上有情無
春流不隔相思夢
立盡斜陽似望夫

泊九江

千種離愁何處無
一雙別淚幾時枯
君看楊子江頭水
流去流來繞二姑

重過漢口

過此於今十二年
看來風景不如前
獨憐漢

水無情物猶向江頭送客船

漢口書曾秀才見隱堂

一齋渾似子雲亭半壁琴尊半壁經門外漢
流明似鏡夜來點過少微星

九日憶父

賦罷歸來十六秋教兒學得覓封侯一尊今
日東籬畔却使黃華笑白頭

悼母

孤塚纍纍海水濱幾年祭掃不曾親若論遊
子他鄉意未信茱萸更是苦辛

悼仲文弟

自從天上玉樓成五六年來隔死生此日憑
高一回首西風斷雁不勝情

憶季文弟

幾載相望天一涯菊花鴻雁負歸期閩山今
日風前帽又爲思兄落不知

憶內

年年此日滯天涯不似今年恨最賒遙憶蘭
堂懸幌處西風吹淚對黃華

憶仲姬

逢時把酒對紅顏親爲拈花插翠鬟今日登
高人萬里教伊獨上望夫山

寄內

此日相思夢亦難關河風雪夜漫漫小樓西

畔休孤倚憔悴花枝不耐寒

醉占

醉臥瑤階月抱身廣寒一夢十年春只因貪
看娑羅樹愁殺桃花洞裏人

下第

長門五上賦如雲不值黃金一二斤歸去鑪
頭還有酒且將毵毵打文君

曲中對酒

相逢俱是十年人
花下尊前莫厭頻
不信但看樓畔柳
青青何似舊時春

憂旱

有客新從建業過
相逢爲問歲如何
迢迢江漢三千里
流水無如涕淚多

埜雲方丈

覓得蓮華第一乘
時時趺坐對禪燈
不須松下看遺草
知道前生也是僧

白門遇鄉人遺石榴花

忽漫相逢楚水涯十年一見故園花
憑君剪下紅綃片盡寫相思寄暮霞

輓魏年兄

寶劍瑤琴色色新可憐零落委黃塵
傷心還問功名事此去遮須第一人

輓許秀才

自從香案玉皇前瀟洒風塵三十年
天上文

章人不識空教留入錦囊傳

輓黃太母

至今機上看啼痕信得君恩是母恩若使鏡
鸞同日歿白雲何處有魚軒

輓林將軍妻

不作紅閨少婦愁長憑夫婿事封侯明年千
騎垂楊道空有春魂倚故樓

題姜節婦董孝子卷

教兒學得漢儒流不枉風霜五十秋君看茫
茫河上水月寒多在栢舟頭

悼女

盈盈白玉覆黃沙斷送春風泣落花一點精
靈應未散時從夢裏獨還家

荅內

無須頻上望夫山一片秋雲萬里關季子舌
頭猶不爛黃金未佩豈空還

得家書

雙鯉朝來楚水邊
蘇蘭錦字薛濤箋
只消看箇平安印
不說相思更可憐

客思

白雲黃葉可憐秋
萬里關河一棹頭
歷歷蓼花汀上月
照人清夢過揚州

其二

露下蒹葭河水寒
東流日夜去漫漫
可能帶

得清秋淚送入梅花閣裏看

其三

當時草色未曾青此夕沙頭飛盡螢莫向王
孫問離別生來元是女牛星

其四

銀河耿耿夜沉沉水上孤燈伴綺琴鸞鳳七
絃彈盡曲一聲齊斷白頭吟

其五

水遠山長未有期
思君日日采江蘼
欲將封寄南飛雁
愁殺西風一路吹

鳳簫怨

綠玉雙裁鳳尾齊
雄愁雌怨海東西
參差按盡相思調
半是歌聲半是啼

其二

憶在春風百尺樓
霓裳一曲鳳凰遊
今宵吹對秋江月月自
淒涼江自流

其三

秋月秋風透紫鸞一聲縹緲水雲寒看來元
是瀟湘竹點點啼痕滴未乾

其四

鳳吹宵吟倚玉窻蛾眉春恨照銀缸彩霞一
隔三千里何似芙蓉對晚江

題紫荊關

燕山易水紫荊分一片孤城斷白雲此日棄

繻關上去無人知是漢終軍

灤陽城樓簡友觀妓

塞上煙霞此一樓東風吹散故鄉愁
勸君莫負看花約酒滿金尊月滿鉤

送龔君愛

蕭蕭風雨滿江邊下馬相看更上船
柳眼才青春正好可堪攀折向人先

寄鄉人

王孫流落楚江濱
丹棘花前兩度春
欲寄南音琴一曲
翻憐君是故鄉人

代妓送別

春情又爲別離牽
舊恨新愁總自憐
莫問歸期何日是
安排腸斷綠窻前

燈下花枝

何處移來幾朶斜
紅紅白白總堪誇
孤燈不與爭春色
獨向尊前綻點葩

陳公子生日

尊前今日看麒麟
繡綬如花角上新
滿地瑤花團綺席
分明是箇玉堂春

寄鄭賓野將軍

一劍曾輕萬戶侯
如今風雨泣床頭
將軍自有平胡策
肯向新豐問馬周

陌上婦

盈盈少婦是誰家
陌上行來柳帶斜
手把素

紈遮笑面半輪明月映桃花

戲荅王內兄惠生鱸

來自松江萬里濤紫鱗六月味偏高細君也
有調羹手不羹吳姬砍鱸刀

聞歌者下獄

一曲琵琶不可歌春愁如海淚如波重關鎖
斷孤燈影奈得揚州夢裏何

壽王生母

青鸞昨日自西來報道瑤池宴又開一樹碧
桃東海上不知花發若干回

限韵用扛字

秣陵城下一條江載到離情日幾艤惟有庾
生挑得起春腸寸寸是愁扛

偶書

一路行來人盡誇不知少婦是誰家東風吹
雪腮邊落點點桃花映柳花

題龍江壽圖

水綠山青可愛回
龍江佳氣接蓬萊
人傳中有雙桃樹
都自三千歲裏栽

簡友賞梅

曉寒忽動玉梅春
三過花風放一巡
却恐笛聲樓上起
君來莫負倚闌人

黃浦夜泊

一痕新月落寒汀
不盡關山曲裏聽
今夜夢

魂歸去易水邊一十二長亭

競渡曲

一箇船兒十丈長一箇幪兒五彩光三鼓鑼
鑼聲未歇打頭搶得是奴郎

其二

人人划槳賽風流划去划來划不休一二少
年輕薄殺浪花划起過人頭

其三

一綰新絲一串錢貪伊長命買來纏怕教白
臂雙雙露纏一邊來纏一邊

其四

江水深深深深復深江頭拋粽到江心多
少拋將去米價從他貴似金

其五

雄黃下了下菖蒲先勸婆婆後小姑記得去
年奴懶出婆婆醉了小姑扶

其六

看看學箇采菱歌
歌去長江當楚些
歌了又歌
郎莫笑相知不在話頭多

莫愁曲

莫愁湖畔花愁奴
莫愁湖底月愁夫
愁月愁花愁欲歎
是誰喚作莫愁湖

其二

湖上春風叫鷓鴣
湖邊春水綠蘼蕪
湖頭一

帶春山裏若箇人家舊姓盧

荅傅學博年兄

君爲地主嫌官冷我笑天公使士寒
來歲上林春更好與君同向暖中看

寄謝以訓將軍

翩翩公子有風流
朔海相逢盡舊遊
聞道當時曾敕趙
千金不惜一狐裘

寄黎文學

遙憶王風滿絳紗
蒲門桃李借光華
可憐鱗木無枝葉
十載漂零楚水涯

玉蝶花

花裏年年春夢賒
逢人都作玉郎誇
只因奪得花魂好
也自風流化作花

其二

花因愛蝶願爲蝶
蝶爲憐花化作花
請君試向東君問道
是花耶是蝶耶

燈前瓶花

箇是何人折得賒紅紅綠綠
白沙沙青燈爲愛添春色也
向尊前綻點葩

送人

桃源花下十年人翻向鄉關一問津
爲報子規啼莫苦江南正有可憐春

客舍悼女阿都

惜汝元同掌上珠
歿生半載竟模糊
醉來孤

館思家處頻向花前覓阿都

其二

少小聰明姐不強可憐骸骨委他鄉
虎丘却是頻經地郎罷從今幾斷腸

與金清之飲咏楊花

與君重見帝京春尊酒相看意轉親
點點楊花飛不去東風猶憶舊時人

壽林西卿五十

酒滿尊中客滿前
鳥歌花舞得春偏
壽君五十年來意
莫枉於今五十年

壽徐生

昨過東海問麻姑
曾見秦時方士無
三十二年前此日
謫將徐福到吳都

爲李生壽兄

丹書元在少君家
不向蓬萊去問砂
今日華堂三進酒
春風吹上杜棠花

黃梅道中

落日長天楚水涯
千峰萬壑斷人家
春風識得相思路
吹出紅綿滿地花

贈江中含生日

仙郎謫世本風流
帶得烟花五月愁
見說有人誇足錦
夜來曾向夢中投

丙戌下第

夜夜床頭泣鬼神
可憐一劍白如銀
怪來不

斷人離別元贈人聞離別人

其二

江上蘭橈八月歸江風江露浦羅衣黃花見
日應南瘦知得相思是帶圍

其三

取次看花滯洛陽見花日短別花長江南江
北芙蓉樹一種花開兩斷腸

其四

不堪離別自年年楚水吳山共黯然更有東
風過楊子莫吹楊柳綠江邊

寄彭潛山

美人爲政有風流一縣如花楚水頭只恨潯
陽潮信少年年不見秣陵秋

觀競渡前一日試舟

楚江競渡有風流此日剛看第一舟莫問錦
標曾奪未人人知道是龍頭

溝頭蓮

一溝流水繞人家
幾朵芙蓉出似霞
不識爲誰留意思
風光六月未開花

晚泊廣信

管絃聲裏擁雲鬟
唱罷雙眉蹙遠山
樓上月華樓下水
夢魂今夜定相關

寄陳生

投轄當年意氣勤
相思萬里隔青雲
歸來買

得長安酒留待花時一醉君

贈薛生

十載江湖一劍行
花樓酒肆不知名
等閑打破風流陣
奪得佳人是馬瓊

贈許希聖將軍

不是無詩可贈君
知君能武復能文
軍前試草平蠻檄
一筆花飛百陣雲

雪中荅汪伯耳招飲

朔風吹雪渡龍沙萬樹枝頭一色花
買酒憑君今夜醉好教筵上臥琵琶

襍意

村樹蕭蕭動曉鴉行人馬上月初斜
憶得仲姬初夢醒鴛鴦枕畔索菱花

其二

橋頭九月梨花香結實垂垂大道傍
憶得仲姬怕離別不將半箇與郎嘗

其三

水邊離落是誰家
秋色娟娟有菊花
憶得仲姬愛瀟洒
時簪一朵向人誇

德安寄黃太守

楚水吳山千里餘
故人相望惜離居
衡陽峯下多回鴈
不帶隨州一紙書

賞芙蓉口占

不向東風怨落花
月明還讓錦交加
狂歌時

欠花前醉不分無錢溲酒家

芍藥

不嫁東風自有期
百花寧早妾寧遲
傷人未解儂家意
都道儂家是可離

送何叅軍之連州判

知君別駕自風流
爲愛看山五嶺遊
山入雲浮鴻鴈少
幾時題字問窮愁

客潛山寄內

一矢朝雲處處愁
蕪城春色皖城秋
江流不作東西水
誰送相思向兩頭

海棠

不嫁梅花不恨孤
梅花自是薄情夫
年年撇得春光去
總使相逢豈識奴

白繡毬

林庭五月花如雪
朶簇心攢巧作毬
錦帳流蘇明月下
玉人欹枕夢揚州

題釣叟

綠樹陰中一小舟
長竿高挂水雲頭
老翁信有經綸手
一釣周家八百秋

挽馬十一

錦水江邊薜濤青
山縹緲綠雲高
明年二月東風裏
定有啼鶯上小桃

閨情

日日堂前看雁歸
汨花彈作雪花飛
夢魂珍

重秦淮畔春水寒多夜渡稀

贈王中軍

將軍意氣似平原三十年間客滿門爲道報
恩須國士得來只是一壺飧

問人索茶

聞君日日試春茶蒲碗春濤幾尺花豈爲故
人愁水厄曾無白絹一封斜

集句題畫

花浦春山水蒲谿尋芳人在板橋西江南光
景依稀似只欠東風一鳥啼

有贈

三月春光柳色嬌傳呼唱徹碧雲遙仙郎自
是乘鸞客欲跨秦娥弄玉簫

有憶

紅紅綠綠滿瑤臺百種瓊芳次第開惟有桂
花開不到想應移去廣寒栽

有寄

彤雲吹散一天風
萍梗隨波西復東
寄語蕭山楊柳月
清光好去照梧桐

折花

撞入桃源小洞天
桃花能笑復能言
東君未許林郎折
一夜春寒泣杜鵑

坐月

小院春寒月上低
好花一樹隔牆西
東風悞

付閒蜂蝶杜宇多情終夜啼

春藕

憶得年時玉井邊一花一葉好來偏而今冷
落東風裏空有千絲不見蓮

瓶花

紫荊黃雀幾枝新一把收來三月春最是丁
香心上結不堪雨裏對愁人

牡丹

占得春風滿洛陽
不勝富貴斷人腸
看來只有梅花苦
歲歲年年冷處香

中秋示友人

與君相對莫沾巾
別恨離愁歲歲新
今夜關山一輪月
斷腸多少倚樓人

題隔牆杏花

一枝拋落上林春
紅殺東風若未新
日暮隔牆烟雨裏
亭亭似憶曲江人

荅金清之

思君不見見君詩又是春風一半時
城北城南十餘里千山萬水草離離

寄鄭開甫國博

以下獄中作

青山北面白雲寒楚客三年棘裏看
聞得故人今日至不知何處是長安

集句

空戴南冠學楚囚傷春未已又悲秋
丈夫飄

蕩合如此不及盧家有莫愁

中秋十四夜雨

去年今夜月團團今年今夜雨珊珊縱有月
明看不得不如聽雨到更闌

寄謝蕭若拙孝廉

西風吹棘北山愁冷落南冠泣未收那道相
思不相識暮雲一片隔城秋

夢上法華

夜來親到上清壇
玉女爲傳寶錄看
莫嘆園墻風雪冷
前身曾作法曹官

送鄭嶽宰之蜀

春山萬里入滇南
春鳥春花傍去驂
一曲春詞歌不得
憑君爲寄過湘潭

元日立春盆梅未發

椒花綵燕一時新
萬戶春風散紫宸
何事南枝偏寂寞
不傳消息與愁人

賀陳司獄得男

爲羨君家舊有聲
德星常傍法星明
青山官舍多佳氣
一夜春風玉樹生

愁暑

五月江南草木枯
可憐夜夜坐黃壚
白雲司裡涼如水
借得清風一點無

寄陳漢陽年兄

江樹蒼蒼江月涼
楚江一望斷人腸
那知有

箇窮愁客此夕相思在漢陽

壽蔡生

淒淒風雪傍園亭四十年來此一經莫爲懸
弧悲對酒生來曾帶貴人星

寄謝翟點蒼

聞君感慨使人嗟獨對南風淚棘花豈有聲
名滿梁楚一朝動得魯朱家

中秋祭月

一行香篆一行啼寄與秋風上月梯二十年
前攀桂客今朝冷落棘園西

仁聖太后訃下連日苦雨

夜來天女引雲輶龍尾寒搖第一星何處山
川不垂淚秋風吹雨晝冥冥

有詔省譴

聞道官家下詔書不知災異事何如微臣
空有憂天意獨望鍾山淚滿裾

獄中得櫻桃

遙想 君王春薦闌玉盤分賜偏于官孤臣
不及上林鳥啣得枝頭一顆看

祈雨呈獄宰

桃枝憔悴棘枝垂况是炎方六月時一雨今
朝都洗盡青山長繞白雲司

爲畢中貴賦

奉帚朝陽下陣才蛾眉不敢向人開君恩還

憶當熊日忍得秋風入扇來

畢中貴爲談宮事有感

漢主恩多總似春
百花叢裡逐年新
憑君莫話宮中事
俱是長門十載人

寄林丙卿

一隔風烟忽兩秋
獨醒人作酒星囚
不知今日虬髯客
又向江湖瞰幾頭

除夕示金清之

寂寞寒燈坐歲窮
園門何處度春風
勸君莫恨家山遠
淮水南頭路不通

贈劉獄宰

飄飄黃綬自東來
帶得春風入法臺
滿眼蓬蒿憔悴甚
一時桃李雨中回

元旦

卜官春珮擁朝班
萬國歡聲動聖顏
獨有綵臣無祝處
隔牆遙拜孝陵山

其二

不信今朝是昨朝
窮愁忽忽轉無聊
看雲望日俱何處
門外青山萬里遙

立春

去年今日看春處
今日看春淚未乾
爲語東風休作惡
梅花消瘦北枝寒

送錢忠臺司理

漢家此日有賢王
千里徵書入建章
君去應

爲求國士莫教獄裏滯鄒陽

對雨

春雨霏霏和淚多
春風拂拂奈愁何
相看不用悲窮鳥
十里山前盡綢羅

對酒示金清之單維明

一點青燈只自明
數杯濁酒爲君傾
不知門外春多少
聽得風聲和雨聲

寄大來

君爲孤客我爲囚
恰好相思莫淚流
當日胡姬樓上飲
與君曾說押衙不

贈張獄宰

鸞鳳肝腸海雀姿
春風日日到寒枝
漢家若使爲廷尉
青史何勞數釋之

寄吳長卿

落魄林生一鬢胡
十年江海眼中孤
至今不識吳郎面
知得吳郎是丈夫

送張宗道還閩

秋風江上白蘋香
一片孤帆挂夕陽
美人歸去不相送
楚水閩山與恨長

中秋夜

眼見秋光兩度新
閉門只有淚盈巾
關山今夜空明月
誰是南樓看月人

贈許希之生日

記得相逢認不真
笑聲如舊哭聲新
看來落

在神仙却莫是旌陽姓許人

答張獄宰

一點寒灰何日然蕭蕭風雪又殘年自憐不
是獄中劍知得張郎字茂先

除夕雨

無情今夜是樓頭零落寒更似水流點點聲
聲風雨裏只除殘夕不除愁

元夕

兄說春光好去年 帝城燈火夜堪憐一輪
明月千門裏不照鍾山照北邊

送江元涉

愁裏逢君又送君來時秋半去春分鳳凰臺
上休頻倚落日鍾山有暮雲

寄謝朱文學

日日傷心倚棘看楚山零落暮雲殘爲君忽
下數行淚飛作霜花六月寒

新月寄內

春城東畔一鉤斜
挂落長安十萬家
箇裏有人憔悴甚
不堪孤影上梨花

送用兒還閩

江上春風桃李初
花將歸去淚沾裾
逢人莫道十郎子
但問誰家好讀書

示潘伯登

黃綬風流早見誇
如今落魄不須嗟
爲君問

得前身事曾種河陽一縣花

嘲巖生

准擬佳期月滿時合歡花畔說相思那知又被東風妬吹起鴛鴦水一池

送單元卿

莫論雕龍與画蛇風波起處卽天涯憐君歸去東門裏獨有空園好種瓜

林初文詩文全集

明福清林

章

著

男

君遷古度

編次

詩餘

長相思

七夕

莫登樓却登樓片月涼生楚水頭何處望牽
牛不傷秋又傷秋一夕西風送客愁分作
九江流

又春思

江南頭江無頭水滿花灣花滿洲花間是妾
樓郎東頭妾西頭妾處春波郎處流勸郎
休薄

菩薩蠻

秋思

山城八月西風惡一夜樓頭催葉落
樓頭西風攪客愁客愁千萬疊零亂如落
葉葉落逐西風那知是客中

醜奴兒令

詠劍

可憐夜夜寒牛斗無奈塵埋得箇人來試向
豐城獄裏開明朝把對長亭酒一曲三杯
直抵龍堆斬却樓蘭塞上回

更漏子

詠啼

春山愁秋水怨闌下兩行珠串桃花雨蓼花
霜長亭十里教和月說因風咽一一鶯喉
燕舌帕上點枕邊聲聲聲點點情

浣溪紗 春恨

燕子樓中覓夢魂
杜鵑枝底認啼痕
惟有遠山江上出
翠氤氳
風送楊花三月雪
水連芳草一天雲
又是去年時候也
儘黃昏

南柯子 詠粧

說甚脂和粉
憑他翠與珠
秋成把鏡自躊躇
愁殺芙蓉一朵水中孤
香汗薰羅帶
紅啼染素襦
都將抖擻向隣姑
却問誰家有女醜

如奴

南鄉子

詠筆

莫道是無緣一夢相隨二十年
畫得蛾眉秦鏡裏娟娟爭柰
傍人不見憐
妾貌自依然
只是郎情不似前
投向莫愁湖上去
漣漣化作春花泣杜鵑

天仙子

詠花

二十四番流水鬪鬪到棟花
春始透無端翻

是送春時紅也慙綠也慙花裏江山愁裏繡
偏是今年寒得陡春與百花相釘餽鶯啼
燕語鬧清明風也逗雨也逗逗殺一枝青豆
蔻

何滿子

詠夢

春日弄花不影秋宵踏月無痕萬疊江山千
古事那消一刻黃昏只怕鶯啼禁苑更愁雁
叫關門 洛浦明珠翠羽巫峯暮雨朝雲離

合悲懽都沒據可憐做盡殷勤落得羅浮歸
後教人喚作香魂

瓜茉莉

春情

但到春來不知是甚麼恁般的把人來奈花
前月下酒裏頭沒處躲便教那病魔愁魔自
家也猜不破潘郎兩鬢沈郎腰都到我則
只是爲伊輕薄撩雲撥雨攬將來風流禍這
人呵偏在我心頭落却知我爲那箇

八六子

望鍾山

翠娉婷只爲一片墻兒費了雙睛正禁苑春
風動處御溝流水忙時教人怎生東君應
惜多情草綠不當幽巷烏啼都隔重城道是
箇三千裏頭人也夢兒孤另影兒清冷不如
燕子年年漢寢梨花歲歲唐陵倚空亭斜陽
照人欲凝

意難忘

別恨

不是尋常想當歌對酒斷盡人腸
墻頭窺宋子洞口引劉郎雲和雨
霎時狂落得箇思量
送將來滿船離恨怎渡瀟湘
月明山色蒼蒼怪昨宵恁短
今夜偏長枕欹蛩響亂衾薄
露草涼應有夢到伊傍又迷却
那廂記門前
一川流水醺着垂楊

滿庭芳

懷感

詩引琴挑釵盟帕贈去年今夕相逢
崔張本

貌宛轉看來同記在碧桃枝下親曾許鸞鳳
雌雄東君薄送將離別三載斷鱗鴻天台
今再訪落花流水無路堪通縱夢魂知處飛
過墻東可奈瓊樓十二迢迢盡霧瑣雲籠君
知否孤舟橋下缺月挂寒空

孤鸞

禁中妓

爲誰拋撇似海燕初分林鶯乍別回首天涯
滿目雲山愁絕東風不憐春色把一枝楊花

吹折直恁粘烟帶雨更盈盈似雪 柰夢兒
相隔恨難說想昨夜孤衾今日雙頰比這青
衫上有幾重啼血一聲晚鐘動了又送人斷
腸時節莫把琵琶亂撥正春江潮咽

風流子

詠柳

誰栽如許樹當官道歲歲占芳辰柰遮李蔽
桃引鶯勾燕水邊烟裏銷盡離魂最堪怪三
眠欺漢主一曲學羌人回首汴堤不知斜日

斷腸潮岸猶逞殘春 多才何處儘章臺上
爭鬪短舞長顰翻道王恭可妬張緒堪嗔看
滿地垂絲因風托雨漫天飛絮逐浪隨塵到
底總成輕薄辜負東君